

E 'soño' di un di 2 Lotto lo tin sigur su riesgonan pa finansa publico di Aruba

otro posibel topico di discusion cu CAFT?

NA 2011 ora Fundacion Lotto pa Deporte a 'crash' financieramente y tabata basicamente den bancarota, pa por a haya un fiancia di un banco local a sera un contracto di maneho cu un duracion hopi largo cu e compania Canadian Bank Note ('CBN').

Manera ta bon conoci e contracto aki di 2011 no t'e esun mas mihor pa Fundacion Lotto pa Deporte. Ta pesey mes tambe na 2017 mester a renegocia e contracto aki, cual te ainda lo tin espacio amplio pa mehoracion na favor di deporte, asina Di Stefano Wernet a splica.

Gobierno di Aruba kier bin awor cu un Lotto nobo, banda di Fundacion Lotto pa Deporte, pa por haya placa exclusivamente pa mantencion di e diferente complehonan deportivo. Esaki riba su mes ta un pensamiento noble dor cu na 2011 den e contrato di maneho cu CBN e directiva di Lotto no a negocia *ningun* placa pa mantencion den deporte.

Sport Subsidiecommissie no ta duna subsidio pa mantencion di complehonan deportivo.

Fundacion Facilidadnan Deportivo cu ta encarga cu e mantencion di complehonan deportivo no ta haya subsidio di Lotto. Ta Gobierno di Aruba so ta duna subsidio (placa di pueblo) n'e fundacion aki.

Cu otro palabra nada di e miyonna di loteria ta destina pa mantencion di e complehonan deportivo. Esaki sigur ta un eror masha grandi mes y un berguensa mayor ora a sera e contracto di maneho cu CBN na 2011, Di Stefano Wernet a sigui splica.

AWEMainta ta di opinion cu Gobierno di Aruba mester ta mas cuatelooso cu e opcion di un di dos Lotto.

Den nos estado democratico di 'Trias Politica' ningun Huez por stop Gobierno di Aruba pa bin cu un Lotto nobo, pero e Lotto nobo aki sigur lo tin su impacto negativo p'e actual contracto entre CBN y Fundacion Lotto pa Deporte, cu ta perde alabez su exclusividad den loteria. Aruba su mercado chiquito sigur no por carga 2 fundacion di loteria.

Esey ta nifica cu no por exclui casonan den Corte p'e daño financiero, cu por bira un claim multi-miyonario, cual placa sigur Gobierno di Aruba no tin.

E ora ey ata Lotto ta bira un otro topico di posibel discusion entre Gobierno di Aruba y CAFT. No ta conoci si Gobierno di Aruba a laga haci caba un estudio di riesgo di un posibel claim.

E caminda mas practico sin riesgo financiero pa finansa publico di Aruba ta pa Fundacion Lotto pa Deporte renegocia un biaha mas e contracto di 2011 cu CBN.

Na bienestar di deporte sigur CBN lo ta habri pa renegocia un biaha mas e contracto aki di 2011. Den e cuadro aki sigur mester si un Junta di Supervision nobo pa Fundacion Lotto pa Deporte pa por renegocia e contracto di 2011.

No por laga e mesun hendenan aki cu ya tin mas cu 10 aña den Fundacion Lotto pa Deporte y cu a firma e contracto cu CBN na 2011 renegocia esaki. Mester hendenan nobo cu vision y profesionalismo den e Junta di Supervision di Lotto pa renegocia e contracto aki. Sigur e ultimo palabra no a wordu bisa den e asunto aki di un Lotto nobo, Di Stefano Wernet a conclui.